

**0,25 literi tikillugu imaqarsinnaasumut imeruusaatit puuinut akitsuut (Akitsuutit normuat 034) aammalu 0,25 literi sinnerlugu imaqarsinnaasumut imersuusaatit puuinut akitsuut (Akitsuutit normuat 035), §1 imm.1, nr.6-mi litra a aamma litra b allassimasut peerneqarsinnaaqullugit Inatsisartut Inatsisaannut nr.17 22. November 2011-meersumut allannguutissatut siunnersuummik saqqummiussinissamut Naalakkersuisut peqquneqarnissaat pillugu Inatsisartunut aalajangiiffigisassatut siunnersuut.**

(Inatsisartunut Ilaasortaq Jens-Frederik Nielsen, Demokraatit)

### **Akissuteqaat**

(Aningaasaqarnermut Akileraartarnermullu Naalakkersuisoq)

### **Siullermeerneqarnera**

Siunnersuummut qujanaq.

Puunut akitsuutit puut nunatsinnut eqqunneqartut amerlassusaat tunngavigalugu akilersinneqartarput. Akitsuut maannakut puiaasaaqqanik utertitsisarnermik aaqqissuussinermi aningaasatigut kajumilersitsinissap qulakkeerneqarnissaa aallaavigalugu atuutilersinneqarpoq 2011-milu qaffanneqarluni.

Puunut akitsuutit 2024-mut aningaasanut inatsisissatut siunnersuummi 47,5 mio. kr.-nut missingersorneqarput, ilimagineqarporli 2024-mit ukiumut 90-120 kr.-nut annertuumik qaffassasut. Tamatumunnga pissutaavoq, Nuuk Imeq A/S matuppat puut eqqussunneqartut amerlingaatsiarnissaat. Pissutsilli arlallit ilisimaneqanngillat, tassunga ilanngullugit tunisassiat eqqussorneqartut katitigaanerat akiisalu qaffasissusiat. Taamaammat puunut akitsuutip atorunnaarsinnerani aningaasatigut kingunnissai kisitsisileruminaatsorujussuupput.

Puunut akitsuutikkut imeruusaatinik eqqussukkanik atuinerup annikillisinneratigut avatangiisini peqqissutsimilu siunertat taperserneqarput. Imeruusaatit eqqussorneqartut amerlanerujartortillugit, eqqakkat peqqissutsimullu sunniutissaat unamminarnerulissapput.

Eqqaamaneqassaaq aamma, puunut eqqussukkanut akitsuutinik iluaquteqartunik Kalaallit Nunaanni immiorfeeraqartoq.

Innuttaasunut aningaasaqarnermi atugassaritinneqartut pitsanngortinneqassasut Naalakkersuisut siunnersuuteqartoq isumaqatigaat. Tamanna pissaaq aningaasat akileraarutininik aaqqissuusseqinnissamik aningaasalersuinermit ilanngunnerisigut, tassani sulinermit akileraarutit appartikkusunneruagut.

Siunnersuuteqartup siunnersuutimi aningaasalersornissaanut siunnersuutigaa akiliisitsiniartarfiup Ilanngaassiviup atuutilersinnissaa imaluunniit aningaasanut inatsimmi

ingerlatsinermut tapiissutinullu aningaasaliissutit akimorlugit 56 mio. kr.-nik sipaaruteqartoqarnissaa siunnersuutigaa.

Ilanngaassivik atuutilersinneqassanngitsoq Inatsisartut aalajangiinikuupput, taamaammat tamassuma aningaasalersuinermi periarfissaanerani oqarnek isumaqanngilaq.

Naalakkersuisut 2024-mut aningaasanut inatsisissatut siunnersuummi Namminersorlutik Oqartussat aningaasaliissutaani akinik akissarsianillu aaqqiinikkut tamanut tunngasumik sipaaruteqareerput. Naalakkersuisut isumaqarput suliassanik sularinnittarneq peqatigitillugu oqallisiginagu tamanut tunngasumik sipaaruteqarqinnissaq naleqqutinngitsoq. Tamanut aamma tunngasumik sipaaruteqarnermi Namminersorlutik qitiusumik allaffissuata saniatigut peqqinnissaqarfik ilanngunneqassaaq. Soorlu Peqqinnissaq pillugu Ataatsimiititaliarsuup isumaliutissiissutaani takutinneqartoq, immikkoortumi maannakkut sipaarsinnaanngilagut.

Naalakkersuisut ESANI-p puunik utertitsisarnermik aaqqissuussinerup nutaap allaffissornikkut aqunneqarnerani aningaasartuutit amerlaqataannik puunut akitsuutip ilaannakortumik appartinneqarnissaanik siunnersuuteqarnissamut ammapput.

Taamaalilluni appaaneq pisiniarfinnut neriunartumillu atuisunut iluaqutaassaaq. Siunnersuut nioqqutissanik eqqussuinermi akitsuutit pillugit Inatsisartut inatsisaata allanngortinneqarnerani Inatsisartut inatsisaattut siunnersuutip (UKA2023/20) ataatsimiinnermi matumani aappassaaneerqarnerani saqqummiunneqassaaq.

Tamanna tunngavigalugu siunnersuutip itigartinneqarnissaa inassuteqaatigineqarpoq.